

INNO: LU PATR'I GRAZIJ



Chin'è la chesa di gent'e spiranzi tant'è la firi: si tocca cu `i manu ! `Nmenz'a lu `ncenzu, `nmenz'a li canti `nmenz'a li manu ijsat'a lu celu, tra chiantu all'occh'e festa `ntò cori scinni lu Patri di tutti li grazii. L'occhi ci `appizzu, lu ciatu mi speddi, l'arma suspira, lu cori m'abbrama forti lu chiamu a `stu Patri di Grazia.

Cu vera fir'e cu veru cori l'am'a chiamari a `stu Patr'amurusu dicennu: viva !
Patri di li Grazii siti, e grazi `avit'a fari, a nuatri peccatur'avit'a perdunari.....
e cu' voli grazia ricurr'a stu Patri di li peccatura dicennu: viva !

A peri scausi, fazzu la strata d'unn'è chi passa `stu Patr'amurusu, ardi la cir'e m'abbrucia lu cori Vegn'a li peri di la Viritati, Cercu giustizia e cercu perdunu, `nmenz'a li vrazza di lu Redenturi. Lu chian'è nicu, la gent'è tanta la banna sona, li botta sparano la fudda trema, li cori parpitanu...

E cui sta niscennu ? Chiddu chi cuverna celu terr'e mari...
e cui voli grazia ricurr'a stu Patri di li peccatura dicennu: viva lu Patri di li grazii!

La grazia di l'arma, la saluti, e la binirizioni di la campagna
ci avem'a dumannar'a `stu Patr'amurusu dicennu: viva lu Patri di li Grazii!

E cui nisciu ? lu mericu di tutti li malati...?!
Chiddu chi guarisci orvi surd'e muti... e cui voli grazia ricurr'a stu Patri amurusu dicennu:
viva lu Patri di li grazii !

Niur'e nicu, la testa abbasciata sott'a lu pisu di li me' peccati: pesanti cchiù chi lu lignu d'a cruci, puncenti chiù chi la cruna di spini. Grann'e sprinnenti cchiossà di lu sulì.
Cu `i vrazz'aperti chi aviti o Patri abbrazzat'a tutta l'umanitati.
Chi cori nicu mi sentu ccà vasciu: comu ci ha' mettiri tuttu stu beni ?

Triunfa lu cel'e la terra chiamann'a stu Patr'amurusu dicennu: viva !
Trema lu `nferunu chiamann'a stu Patri di li peccatura dicennu: viva !

`Na chisuledda stritta tra li casi: lu pass'allenta e lu pinseri vola a tempi antichi chi nun canusciu: sacciu pi certu lu dissi don Santu `nca ccà Vulistivu, la prima vota, dar'a Ciminna un signu'e un pignu di tant'amur'e misericordia.

Trema e gioisci sott'a ssà gran cruci Ciminn'accrama'e cu gran vuci grira: Viva lu Patri di li peccatura.

Il testo scritto da Arturo Anzelmo nell'aprile 1997 fu musicato dal Maestro Salvatore Scinaldi ed eseguito in San Giovanni Battista dalla Corale Santa Maria Maddalena, diretta da Michele Cassata.